


*Life of Christ  
Tagalog*

# Mga Tampok na Pangyayari *sa* Buhay *ni* Cristo



*Aralin 2-6*

## ARALIN 2

### MGA TAON NG PAGHAHANDA

#### **Nakita ni Jesus ang Pangangailangan ng mga Tao**

Si Jesus ay lumaki sa Nazaret, isang lunsod na may 15,000 mamamayan, lalawigan ng Galilea. Ito'y isang pinagtitigilang lugar na nasa malaking kalsada, sa pagitan ng Jerusalem at mga daungan ng Tiro at Sidon. Ang bisyo at krimen ay palasak na kaya nga ang sabi ng mga tao ay, "May mabuti bang bagay na magmumula sa Nazaret?" Nakita ni Jesus ang kasalanan: ang kasakiman, kasamaan, kalupitan, at paghihimagsik laban sa Dios. Nakita Niya na ang mga lalaki at mga babae ay mga alipin na ng kasalanan.

Habang si Jesus ay gumagawang kasama ni Jose sa kanilang gawaan, narinig Niya na ang mga kalalakihan ay naghahangad ng kalayaan mula sa pamahalaan ng Roma. Nguni't alam ni Jesus na ang kalayaan pulitiko ay hindi makalulutas ng kanilang mga suliranin. Kinakailangan ng mga tao ay kalayaan mula sa kasalasang naghahari sa kanilang mga buhay. Siya'y naparito upang magkaloob ng kalayaang ito. Ang Kanyang pangalan, Jesus, ay nangangahulugang Tagapagligtas. Sinabi ng anghel kay Jose:



*"Ang pangalang itatawag mo sa Kanya'y Jesus: sapagka't ililigtas Niya ang Kanyang bayan sa kanilang mga kasalanan" Mateo 1:21.*

#### **Natutuhan ni Jesus ang Salita ng Dios**

Pinag-aralan ni Jesus ang Salita ng Dios at Siya'y naghanda para sa Kanyang gawain panghabang-buhay. Nang Siya'y labindalawang taong gulang na, naunawaan na Niya ang Salita ng Dios higit kaysa sa Kanyang mga guro. Minahal Niya ito at lagi Niya itong sinusunod.

## Si Jesus ay Binautismuhan

Umalis si Jesus sa Nazaret nang Siya'y tatlumpung taong gulang na at Siya'y nagtungo sa bayan-bayan upang magturo ng Salita ng Dios. Inakay Siya ng Dios sa kinaroroonan ni Juan Bautista na nangangaral. Binautismuhan ni Juan si Jesus sa Ilog ng Jordan.



*Pagkatapos nang mabautismuhan si Jesus ay umahon Siya sa tubig. Nangabuksan sa Kanya ang mga Langit, at nakita Niya ang Espiritu ng Dios na bumababang tulad sa isang kalapati, at lumalapag sa Kanya; At narito, ang isang tinig na mula sa mga Langit, na nagsasabi, Ito ang sinisinta Kong Anak, na Siya Kong lubos na kinalulugdan" Mateo 3:16, 17.*

### Gawin Mo Ito

1. Punan ang mga puwang:  
Ang kahulugan ng "Jesus" ay \_\_\_\_\_.  
Si Jesus ay binautismuhan sa Ilog ng \_\_\_\_\_ ni \_\_\_\_\_ Bautista.  
Sinabi ng Dios: "Ito ang sinisinta Kong \_\_\_\_\_."
2. Mula sa anong bagay ililigtas ni Jesus ang mga tao?  
\_\_\_\_\_ a) Pamahalaan ng Roma  
\_\_\_\_\_ b) Kahirapan at sakit  
\_\_\_\_\_ c) Kanilang mga kasalanan

### PINAHIRAN PARA SA GAWAIN NG DIOS

Ang mga propeta, mga sasardote, at mga hari ay pinahiran ng langis upang maipakita na ang Espiritu Santo ang tutulong sa kanila sa paggawa nila para sa Dios. Ang ipinangakong Tagapagligtas ay tinawag na Mesias o Cristo. Ang dalawang pangalang ito ay nangangahulugang "pinahiran." Ang propetang si Isaias ay sumulat tungkol sa Kanya:



*"Sumasa akin ang Espiritu ng Panginoon, sapagka't ako'y pinahiran Niya upang ipangaral ang mabubuting balita sa mga dukha: Ako'y sinugo Niya upang itanyag sa mga bihag ang pagkaligtas, At sa mga bulag ang pagkakita, upang bigyan ng kalayaan ang nangaaapi, upang itanyag ang kaayaayang taon ng Panginoon" Lucas 4:18, 19.*

Ang hula ni Isaias ay naging totoo kay Jesus. Siya ay nagtungo sa bawa't dako na nangangaral ng Mabuting Balita. Hinipo Niya ang mga maysakit at sila'y nagsigaling. Ang bulag ay nakakitang muli. Ang mga bihag ng kasalanan ay nakasumpong ng kalayaan. Ang sabi ni Jesus tungkol sa hula ni Isaias ay ganito: "Ngayo'y naganap ang kasulatang ito sa inyong mga pakinig!"

### Gawin Mo Ito

3. Isaulo ang hula ni Isaias.
4. Anong mga pangalan ang nangangahulugang "pinahiran" \_\_\_\_\_ o \_\_\_\_\_.
5. Sinabi ni Jesus, tayo ay katulad ng \_\_\_\_\_ at ng \_\_\_\_\_ ng sanlibutan.

## TINUTURUAN NI JESUS ANG BABAING TAGA-NAYON

### Ang Paglalakbay Sa Samaria



Pumili si Jesus ng labindalawang lalaki upang maging katulong Niya. Tinatawag natin silang mga alagad Niya o mag-aaral. Ang dalawa sa kanila, si Mateo at si Juan ay sumulat ng buhay ni Jesus. Sinasabi ni Juan ang pagdalaw ni Jesus sa Samaria.

Ang pinakamalapit na daan mula sa Galilea tungo sa Jerusalem ay ang pagdaan sa lalawigan ng Samaria.

Marami sa mga manglalakbay ay umiiwas dumaan sa Samaria kahit mangahulugan ito ng malayong lakbayin sapagka't namumuhi sila sa mga Samaritano. Mababa ang kanilang tingin sa mga Samaritano, sapagka't sila'y nagmula sa ibang lahi at sila'y mayroong ibang kaugalian. Subali't hindi ganoon ang pakiramdam ni Jesus sa mga Samaritano. Mahal Niya ang bawa't tao. Ipinangako ng Dios na ipadadala Niya ang ilaw ng kaligtasan lahat ng mga bansa. Kaya nga, si Jesus ay nagtungo sa Samaria upang dalhin doon ang kaligtasan mula sa Dios.


### Gawin Mo Ito

6. Si Jesus ba ay palakaibigan sa mga Samaritano?

- a) Hindi. Sila ay mula sa ibang lahi at relihiyon.
- b) Oo. Iniibig ni Jesus ang bawa't isa.
- c) Hindi. Sila'y masyadong makasalanan.

### ANG TUBIG NA NAGBIBIGAY NG KASIYAHAN

Sa bayan ng Sicar, si Jesus ay umupo sa tabi ng balon habang ang Kanyang alagad ay umalis upang bumili ng pagkain. Nang lumapit ang isang babaing taga-Samaria upang kumuha ng tubig, humingi si Jesus ng maiinom. Siya ay namangha sa pagkukusa ni Jesus na makipag-usap sa kanya.



*“Sumagot si Jesus at sa kanya’y sinabi, kung napagkikilala mo ang kaloob ng Dios, at kung sino ang sa iyo’y nagsasabi, Painumin mo ako; ikaw ay hihingi sa kanya, at ikaw ay bibigyan niya ng tubig na buhay. Sinabi sa kanya ng babae, Ginoo, wala kang sukat isalok ng tubig, at malalim ang balon: saan nga naroon ang iyong tubig na buhay? ... Sumagot si Jesus at sinabi sa kanya, Ang bawa’t uminom ng tubig na ito ay muling mauuhaw: Datapuwa’t ang sinumang uminom ng tubig na sa kanya’y aking ibibigay ay hindi mauuhaw magpakailan man; nguni’t ang tubig na sa kanya’y aking ibibigay ay magiging isang balon ng*



*tubig na bubukal sa kabuhayang walang hanggan”  
Juan 4:10-14.*

Kung ang katawan ang nangangailangan ng tubig tayo ay mauuhaw. Ang ating espiritu ay nangangailangan ng isang bagay na katulad ng pangangailangan ng katawan sa tubig. Hanggang hindi ito masumpangan, hindi tayo masisiyahan at tayo’y mauuhaw sa espiritu.

Ang babaing taga-Samaria ay naghanap ng kasiyahan sa pag-ibig. Limang ulit siyang ikinasal at namuhay na kasama ang isang lalaking hindi niya asawa. Alam ni Jesus ang lahat ng tungkol sa kanya sa unang pagkakita pa lamang sa kanya. Alam ni Jesus na siya’y hindi magiging maligaya liban na mapatawad ang kanyang mga kasalanan. Kaya’t sinabi ni Jesus ang tungkol sa kanyang mga kasalanan. Inamin ng babaing taga-Samaria na gayon nga gaya ng sinabi ni Jesus. Napag-unawa ng babaing taga-Samaria na si Jesus ay isang lalaki ng Dios, isang propeta. Natitiyak niyang siya’y matutulungan ni Jesus. Nagtanong siya kung paano sasambahin ang Dios. Isaulo mo ang sagot ni Jesus:



*“Ang Dios ay Espiritu: at ang mga sa kanya’y nagsisisamba ay kinakailangang magsisamba sa espiritu at sa katotohanan” Juan 4:24.*

Ipinaalam din ni Jesus sa kanya na Siya ang Mesias. Gayon na lamang ang kagalakan ng babaing Samaritano sa kanyang pagkakatagpo sa Tagapagligtas! Mula ngayon ang kanyang buhay ay magiging iba na. Agad niyang pinuntahan ang kanyang mga kaibigan upang sabihin sa kanila ang tungkol kay Jesus. Sila man, kailangan din nila ang buhay na tubig na ito.



*“At lalo pang marami ang mga nagsisisampalataya sa kanya dahil sa kanyang salita, at sinabi nila sa babae, ngayo’y nagsisisampalataya kami, hindi dahil sa iyong pananalita: sapagka’t kami rin ang nakarinig, at nalalaman naming ito nga ang Tagapagligtas ng sanlibutan” Juan 4:41, 42.*

Ang mga tao ay naghahanap ng kaligayahan sa mga bagay-bagay, pag-ibig, gamot, alak, pag-aaral,

kapangyarihan, relihiyon, mabubuting gawa, o pagtakas sa mga katotohanan ng buhay. Alin man sa mga ito ay hindi makapagbibigay ng kasiyahang lubos. Si Jesus at ang Kanyang Pagliligtas ang tanging makatutugon sa iyong kauhawan.

### Panalangin



*O Dios na lumikha sa akin, alam Mo ang pangangailangan ng aking nauuhaw na espiritu. Patawarin Mo po ako sa aking mga kasalanan. Bigyan Mo ako niyaong Tubig na buhay upang matugunan ang aking pagkauhaw.*

*Turuan Mo akong sambahin Ka sa espiritu at sa katotohanan. Bayaan Mong makatagpo ko si Jesus at malaman ko sa aking sarili na Siya ang Tagapagligtas ng sanlibutan.*

### Gawin Mo Ito

7. Nasumpungan mo na ba ang tunay na kasiyahan kay Jesus? \_\_\_\_\_  
Nais mo ba? \_\_\_\_\_  
Basahin mo ang panalangin sa itaas nang limang ulit.

### TINURUAN NI JESUS ANG MAYAMANG LALAKI

Minsan, isang lalaki ang tumatakbong lumapit kay Jesus, lumuhod sa harapan Niya at nagtanong: "Mabuting Guro, ano ang gagawin ko upang ako'y magmana ng buhay na walang hanggan?" Sinisikap niyang maging mabuti upang makapasok sa magandang tahanan sa Langit. Ang mayamang lalaking ito ay hindi nakamatay o nagkasala ng pangangalunya. Hindi siya nagnakaw, nagsinungaling o nandaya. Iginagalang niya ang kanyang mga magulang.

Napakabuti niyang tao, subali't kulang siya ng isang bagay. Walang sinuman ang may sapat na kabutihan upang makapasok sa Langit.



Ang kasalanan niya ay kasakiman. Inisip niya ang sarili niyang kaginhawaan higit kaysa makatulong siya sa iba. Higit niyang minahal ang salapi kaysa Dios. Kinakailangan din niya ang kaligtasan tulad ng pangangailangan niyaong babaing Samaritana. Kinakailangang unahin ang Dios upang magkaroon ng tunay na kaligayahan at buhay na walang hanggan.



*"Pagtitig sa kanya ni Jesus, ay giniliw siya, at sinabi sa kanya, isang bagay ang kulang sa iyo: Yumaon ka, ipagbili mo ang lahat mong tinatangkilik at ibigay mo sa dukha, at magkakaroon ka ng kayamanan sa Langit: at pumarito ka, sumunod ka sa akin"*  
Marcos 10:21.

Maibibigay ni Jesus ang kanyang hinahanap, buhay na walang hanggan, subali't umalis siyang namamanglaw. Pinili niya ang kayamanan sa lupa kaysa sa kayamanan sa Langit.

#### Gawin Mo Ito

8. Sa iyong palagay, ang mayamang lalaki ba ay gumawa ng mabuting pagpili? \_\_\_\_\_  
\_\_\_\_\_
9. Ang pagsisikap bang maging mabuti ang siyang magdadala sa atin sa Langit? \_\_\_\_\_  
\_\_\_\_\_